

Asisko gutuna

2013ko Urtarrila.

3. printzipioa.

Eguneroko bizimodua: kanporantz, elkartasuna

51. zenbakia

Asis Sarea eguneroko bizimoduan espiritualtasun frantziskotarra ezagutu edo partekatu nahi duten lagunen sare sozial irekia da.

Krisiak gure gizarteko sustraiak astindu dituen honetan guztioi egiten zaigu elkartasunez jokatzeko deia. Ezin landu inolako espiritualtasunik geure burua eta geure ongizate soila ardura zai-gunean. Elkartasuna, besteeiko begirunea ezinbesteko eta oinarrizko urrats gertatzen zaigu.

Hala ere ongi aztertu behar nondik sortzen den gure elkartasuna, zein iturritik edaten duen, geure buruak ez engainatzeko, zuzen jokatzeko, egiazko espiritualtasuna lantzeko.

Gogoetarako gaia

Zergatik ematen dugu?

Egon badago ematen duenik, irudi onak bera-
rentzat asko balio duelako. Askoz lehenagotik
egon badago behatz bat ere mugitzen ez duenik
eta bost axola zaionik ... Egon badago ematen
duenik, hori egitean ondo sentitzen delako. Ez
da gutxi: ondo sentitzeko edozerk balio duen
ongizatezko gizarte batean, asko esan nahi du
ongi sentitzeko moduen artean besteen alde
jokatzea hautatzeak.

Egon badago ematen duenik, hori duelako
mundu zuzenago eta solidarioago baten alde
borrokatzeko modu zehatza bere errealitatetik,
eta hori bere hondar-alea.

Egon badago bizitzan ondo joan zaiola dakie-
nik. Eskertuta bizi da hartu duenagatik, eta ba-
daki orain partekatzea tokatzen zaiola hainbes-
teko zortea izan ez duenarekin.

Egon badago, gertatuak gertatu, sentiberatasuna
galdu ez duenik eta sufritzen duenarengan per-
sonaren duintasun sakona ikusten duenik. Eta
hori maiz, argudio eta hitzik gabe: besterik gabe
“eragina” egiten dio bihotzean. Inbidia emate-
koa da hori, hori zortea! Beraientzat ematea,
arazoen sustraia konpontzen ez duela jakinik

ere, betebeharrak baino gehiago da; seinale bete
betea da, humanoagoak bihurtzen dituen zer-
bait.

Horrez gain, egon badago sinestun duenik eta
koherente izaten saiatzen denik Jainkoak eskatu
eta Jesusek bizi izan zuenarekin: lagun-hurkoa
maitatu, goseak dagoenari jaten eta egarri de-
nari edaten eman ...

Egon badago eman eta partekatzen duenik, hori
duelako modua Jesusi jarraitzeko, Erreinua
eraikitzeko deiari erantzuteko. Behartsuaren
aurpegian senidea ikusten du. Gure Aita otoi-
tzeko “emaguzu gaur egun honetako ogia” esal-
dia ez zaio, jada, huts gelditzen; egia bihurtzen
zaio barrutik, horretarako lanean ari delako.

Egon badago Jesusek Erreinuaz esandako para-
bolatan berorien dinamika misteriozua aurkituz
doanik: Jainkoa eginez doa bere erara; ez dago
proporziorik norberak egiten duen eta azkenean
gertatzen denaren artean. Horregatik eman egi-
ten du, eta hori egitean lankide sentitzen da,
berea ez duen eta Jainkoarena den Erreinu.

Ebanjelioko pasartea: Mt 6, 1-4

Ez egin gero zeuen erlijio-betebeharrak jendaurrean, jendeak ikus zaitzaten; horrela, ez duzue sari-
rik jasoko zeruko zeuen Aitarengandik. Beraz, limosna egitean, ez ibili turuta joka, itxurazaleek
sinagogetan eta kaleetan egin ohi duten bezala, jendearen txaloak irabazteko. Benetan diotsuet: Har-
tua dute beren ordaina.

Zuk limosna egitean, ez beza jakin zure ezkerak zer egiten duen eskuinak; horrela, zure limosna
ezkutuan geldituko da, eta ezkutukoa ere ikusten duen zeure Aitak emango dizu ordaina.

Frantziskotar espiritualtasuna

Zorionekoa on guztiak Jainko Jaunari bihurtzen dizkion zerbitzaria, zeren zerbaite beretzat hartzen duenak bere Jainko Jaunaren *dirua gordetzen baitu beretzat* (Mt 25,18), eta *eduki uste zuena ere kendu egingo zaio* (Lk 8,18) (Ahol 18,2). Esker on eta harriduragatik ematen du Frantziskok. Esker ona Jainkoari, Harengandik baitator on eta dohain oro, bizi eta argi oro, egite eta grazia oro. Eta harridura Jainkoaren aurrean, hark emateaz gain bere burua baitu ematen eta entregatzen. Frantziskok, zenbat hartzen duen badakielako ematen du; oparitan ematen zaion guztia ospatzeko ematen du; dena Jainkoari ordaintzeko ematen du, aitortuz eta ospatuz hura dela iturri bakarra, ospe guztia dagokiona.

Egunero bere burua jaitsi eta ematen digun Jesu Kristo kontenplatuz esaten digu: “Beraz, ez gorde zeuentik ezer zeuentzat, osorik har zaitzaten osorik ematen zaizuenak” (OrG 29). Frantziskoren emateak eta emana bizitzeak Jesu Kristoren bihotzean eta erraietan sartzen gaitu. Ematean eta partekatzean, Frantziskok Jainkoaren gupidazko erraietan esku hartzen du. Pobre eta behartsu batekin aurkitzen den bakoitzean, bere konbertsio-hasieran bezala, Jainkoak gidatua sentitzen da errukia egitera eta Jainkoaren gupida presente egitera.

Otoitza

Banatu eta partekatu ezer ez duenarekin, baina dena merezitzeko duin denarekin beraren eta Jainkoaren aurrean.

Banatu eta partekatu, ez soilik sobran duguna, baizik baita geure lanaz lortua ere eta are beharrezko duguna.

Banatu eta partekatu, justizia eta maitasunagatik, legeak dioenaren gainetik, konturik eraman gabe, bestea gustura senti dadin arte.

Banatu eta partekatu, xalo izanez eta emana biziz, gehiago edo hobea izateko usterik gabe, ordainik edo esker onik exijitu gabe.

Banatu eta partekatu, ebanjelikoki aldi oro, nonahi, egokiera guztietan, oraintxe bertan.

Banatu eta partekatu, edo saiatu behinik behin; sekula ez bakarrik, beti konpainian; inoiz ez salbatzeko, eta are gutxiago salbatua sentitzeko; soilik banatzea eta partekatzea posible egiteko, zuk bezala, Jauna.

(Moldatua: Florentino Ulibarri)

Gutuneko azken hitzak

“Maitasunaren neurria, neurririk gabe maitatzea da”. (S. Agustin)

2013ko otsaileko eguneroko Ebanjelioa

Egunero Ebanjelioa irakurri nahi duten lagunek, egun bakoitzari dagozkion irakurgaien arabera, hemen dauzkate otsaileko erreferentzia guztiak:

1 Mk 4,26-34	7 Mk 6, 7-13	13 Mt 6, 1-6.16-18	19 Mt 6, 7-15	25 Lk 6,36-38
2 Lk 2, 22-32	8 Mk 6, 14-29	14 Lk 10,1-9	20 Lk 11 29-32	26 Mt 23,1-12
3.Lk 4, 21-30	9 Mk 6, 30-34	15 Mt 9, 14-15	21 Mt 7, 7-12	27 Mt 20,17-28
4 Mk 5, 1-20	10 Lk 5,1-11	16 Lk 5, 27-32	22 Mt 16, 13-19	28 Lk 16, 19-31
5 Mk 5, 21-24.35b-43	11 Mk 6, 53-56	17 Lk 4, 1-13	23 Mt 5, 43-48	
6 Mk 6,1-6	12 Mk 7, 1-13	18 Mt 25, 31-46	24 Lk 9, 28b-36	

Geure web gunea bisitatu

www.asissarea.org




Asis Sarea

646 21 48 96